

名山之靈身無濁穢受形已定雖不任道常
爲真君而作外護不欲濁惡以此忤真仙童
答曰此六老人是我法親聞我請道心助懼
喜雖非十善亦无重罪身雖俗士亦有好心
聞有真道目不曾親遙思遠念誠在可哀山
神聞仙童之言復語老公曰子審如仙童之
言安定身心不須震懾思惟正法依教修行
時諸長者作禮而退

太上大道玉清經卷之五

太上大道玉清經卷之六

昭靈品第十五

星六

爾時南昌宮中上仙名曰昭靈與其侍從萬
五千人俱皆言龍初會凡身受度修道成
聖具慈悲力才得六通能遊無間壽命已定
如鍊真金無有變易昇自在地智慧廣大不
可度量身心無礙猶如虛空以七月十五日
上登太霄昇入玉清天中朝謁天尊於雲宮
之中頓首道前問訊起居而作是言此以塵
濁穢賤濫當爾度昔蒙大道慈流非分擢
錫以壽命叨佩至法自此已後依戒修行果
所希望理應晨夕侍衛天尊常當受事特爲
下界凡夫形骸臃臃又爲天路遙長非凡所
登誠違起居每以翹想青雲之上歛慈紫闕
之下徒以人微道淺致乖心願鬱悒之情歷劫
纏懷不任戀慕之誠仰披雲霧上冒威嚴得
親尊顏以申虔拜言畢頓首喜不自勝
天尊愍之而告仙人曰生化之道理合自然
我亦未曾故有所施亦無情而鼓物焉能生
汝善男子如人愛滅道亦無心逆其情而生

之汝心好生道亦無心違汝情而滅之若以
萬物之情極昇沉之願者於際會之間自然
而辨道處玄極之際故能順物如流生之與
滅道不能違也生而不滅吾道無心而能滅
之滅而不生道亦無心而能生之汝今得生
由汝願力道無心而生之心有背向各尚其
志雖有道力不能先之汝願學道之初元由
汝心自因自果不我知也所謂自然之道冥
自然之心耳是時諸仙人聞天尊之言不敢
辭對天尊又曰天路遙長汝來何爲仙人答
曰故申對謝欲觀上道微妙至法
天尊告曰上道混化塵沙不辨如胚胎之未
分似混沌之無元棄賢去智不晦不明溟滓
無際焉能有妙與汝觀之無上大道若變化
一事若起滅一事若受一事若持一事若居
一事若舉一事若顯一事若與衆觀之與人疑
之無有是處無上大道亦無微妙冥冥空寂
自覺覺他無心觀察無心分別此之與彼况
能有妙與汝觀之無色無相猶如虛空無有
內外善男子汝欲觀者可往雲宮東北方去

此方有大地微塵里數太虛之中有三上真
 在彼空中修無上道今入凝神大定于今已
 經九億大劫次應入忘形大定八億大劫次
 應入六虛大定七億大劫次應入無礙大定
 六億大劫次應入太虛大定五億大劫次應
 入洞惠百萬大劫次應入生惠十萬大劫當
 來應下觀三十七天次遊凡境俱號後聖太
 平天尊將諸侍從億億萬眾說無為法而度
 眾生此時成迴數如塵沙汝欲觀者觀此天
 尊微妙之法

爾時仙人聞天尊教示歡喜拜伏奉辭天尊
 時諸仙人齊駕慶雲浮空而去修歛之間已
 到太虛遙見三真在於空中窈窕溟漠依佈
 紫雲之內霏微於明霞之上丹霄結緯黃精
 為牀三氣凝液二景銜芒太虛為牖虛境為
 窓^{星六}胚胎未始混沌初元服氣藏真寂寂無言
 冲虛絕象萬化未根空湛靈軀五花潛敷三
 宮育真六府凝神三魂不浮七魄不遊神精
 不動真氣不流恬淡滢渟無所經求爾時仙
 人觀此微妙齊下慶雲膝步輕雲汎虛而往

空陳所因匍匐飲氣不敢有言虛苑玄中不
 知劫數注心觀妙不覺有身修歛之間不見
 三真霞帳所明不測所之良久之間歛亡空
 帳唯存光炁朧朧而然又良久之間忽見三
 真出虛入無或亡或存呼吸風雲乍合乍分
 良久之間冥然絕影合氣都亡復經良久靈
 風八震神氣四衝吹噓交扇顯晦不恒又良
 久之間不動而生不營而成三晨坦察萬化
 潛萌此靈根於紫精散靈魄於雲房動空塵
 於無境流元和於皓蒼噓萬氣於叢生布真
 精於萬萌垂神足於靈網閉握固於初嬰出
 六虛而無辨為眾有而窺窻不沉不浮處空
 而停不動不寐履化而經無形之形無生之
 生處幽而孚慶昏而明反觀復照妙體無形
 常住不變焉能所更心冥不動假寓無驚不
 宰不割不教不令不智不愚不令不行夷然
 用道無情交競捐機釋垢虛心自鏡寒空室
 隙收視反聽影響雖繁端心無異冥乎太空
 形無死地
 爾時仙人觀此神化五情自夫雖經劫數冥

然不覺忽見真人入於生惠始悟風雲改變
 萬物動生是時仙人但於空中頓首霄間行
 願雖承道力喜懼不敢自寧
 爾時三真慙諸仙人知其來意乃震希聲而
 語仙人曰子來何為艱辛雲路吾與子同稟
 一道外何所觀爾時仙人不敢陳辭但求哀
 慙賜垂開度是時太平道君告仙人曰子何
 不任神氣於忽恍之間委自然於有無之際
 隨會合離縱運推移歛恍浮虛體不常居存
 於無形銷聲滌慮曠若長虛冥神無處鑑虛
 映空服氣藏真混紫精之靈根凝魄於雲
 房泯輕塵於太始息元和於昊穹任物自生
 從真晦明輕少雲崖之端能不動而常行宅
 中虛而已立恒如嬰兒之未嬰不聽不窺隨
 之有情不釋不取不滿不空泯而無際是謂
 玄同爾時仙人虛聞真君之言微聲一諾響
 未卒聞仰視真人已昇虛極追從不及欲啓
 不聞形入太無氣泯浮雲思心歛懸願欲侍
 從丹誠僅半歛而告言我絕待無繫云何自
 滯子未都忘乘雲御氣是時仙人纔欲有言

以見太真御空而邁速逾奔星迅過電掣爾時仙人思惟良久忽見真君金容在玄應周色象汎汎而然若遊氣之在虛不可視聽知其神化微妙之事爾時仙人與其侍從住於虛中但以思念太平天尊所作神變虛心上

既欲知真五六願從天尊遊於下界五心心願念志不暫移天尊慙之乃於玄中而告仙人曰無上大道法皆自然神力變化雖能隨心而心未曾勞雖復隨身身亦不作所謂無為而為無作而作無作而作無所不作無為而為無所不為若有為而為而不周有作而作而不普不役於心不勞於身心不煩而能靈身不勞而能生靈合併無種不成所謂不作而成不為自生道常無為無所不為混元根本理盡於斯善男子我亦無心而為此神變推運降合和生氣為諸來生而作法門不得爾汝今當知無上大道而為諸塵經於心口慈悲之道法應如此亦如汝等昔在塵中而遇大道廣作津濟亭毒令私濟度枯朽此亦大道而施慈母之恩也懷抱養育飲食

覆護種種教招雖不為勞亦經於心天道至大應之甚微亦無感而不動未聞求而有違大道如海衆流所歸大道如天群物所依善男子我不遊之日近無多時數萬劫間瞬速已至剋此已前應上大羅之上朝謁元尊次往諸天遍啓群真汝等雖是上仙周遊之法未至極天汝且還南昌宮中十萬劫後我當下過南昌之中自應見汝爾時上仙受大平天尊教教拜辭而去歸南昌宮中爾時天尊亦以浮生上昇大羅朝謁元尊然而無言俱以神交又昇大羅之上朝謁虛無天尊亦皆無言太上冥寂道境默然而止不謂不言又入太虛道境都無所見太平天尊亦皆無形又如三劫微以遊氣汎然而下如是三尊昇上一萬二千天中冥然無形次入中一萬二千天有形五六無言次入下一萬二千天始有言說天尊後至玉清天中見雲宮之內大悲天尊言推運日至應勞道化太平天尊答言為此因緣上朝真帝粗得周遍爾時太平天尊三聖法身同坐一座又經十劫與大悲天尊靜

默而坐爾時南昌上仙觀天尊真光遠暎不比尋常是時玉清之天已下諸後學得道上中下仙億億萬衆各賞供具香花幡蓋作衆伎樂浮空而來朝慶太平天尊并朝大悲真帝燒香散花歌頌讚歎鼓衆伎樂圍繞雲宮

七日夜諸天雨花香烟凝虛瓊林敷花以承甘露金山涌出玉髓流津龍芝起霞隱草擎雲空洞虬吟仙霞翳天白虎嘯歌微風拂塵衆仙四周真宰列筵爾時諸仙各下浮雲齊整威儀一時稽首長跪瞻仰正見天尊各坐三宮通披霞衣神識似嬰瞻仰未周已入無形三宮紫雲霧空而生良久之間忽見一尊獨坐一宮復良久間忽見二尊列坐俠侍或恍忽存亡或混三為一或散一為三出入無體不常居爾時仙人頓首良久南昌上宮照靈仙人長跪空中而作是言五六昔在太虛得觀天尊數億劫中立侍太空忘退之心濫蒙垂慈示以期會非分提攜自辭以來傾誠如昨下界迄充屢有壞成翹勤之心恒如渴飢忽覩真光遠暎與本不殊如是天尊周旋事

欲所為神已知之身欲造惡神不從之人身陰賊魂不受拘魄不受制三元八卦能閉上帝以是因緣可得而知人有陰德三魂不離七魄不散善神扶助天兵衛護以是因緣自然合道善男子無上大道不言而知恐汝未

達深須戒之勿得輕宣善男子汝數億萬劫過我於太空之中又今值我得聞妙法不久之間自然洞曉一切諸法真偽之心如對目前无不辨了此諸身心通道故能洞達無有障礙爾時諸仙聞天尊慈悲即互相歡喜頓首長跪各命侍從奏樂娛善千音合響法鼓凌霄其時浮霞流轉香烟遶虛飛蓋迴空長幡舞風龍吟遙天鳳唱虛庭天地震動二景垂輪神蟾出月以蹈虛靈鳥鼓翼以翔空當此之時下界三十七天後學成仙見此祥瑞一時騰空上至玉清如雲之交太平天尊語昭靈曰仙無大小皆能感動天地制御萬靈當知道力不可思議今諸下仙皆得聞知爾時三十七天仙入億億萬眾遍滿雲宮燒香散花各陳本願爾時天尊遍知其意即為

諸來大衆而入慈心大定攝受衆心入於靈冊之中合自然九變之道化成九天中有九氣結成九府爾時三尊分居九府各坐九龍寶座當此之時號為九府真人太平道君引諸仙人一時而入九府之內

爾時天尊為諸仙人說九仙之道上應九天中應九宮玄應九氣下攝九衆能入無間所謂一生三三生九九九八十一主於始生之法輪轉無窮今諸後學之人能生成常居始生自然成真諸來仙人觀此微妙不敢致辭亦各知其從此得生不知今者天尊開示慈勸委曲內懷慙愧不知何謝是時天尊逆知其意即告之言無上大道都無所須何俟多言我身坐道場神交萬帝我非不凡受于虛言若言得道者下鬼凡夫唯除啞人未會無言不能得道我非謂大道應凡之時都絕無言我今真身汝又非凡以是義故汝於此中為不了達心請問義自外默聽無上大道法無辭謝是諸仙人受天尊教勅各各頓首心思道恩良久之間南昌宮中昭靈上仙

稽首而言昔承天尊推運下世周遊十方時刻未到願得天尊下臨南昌少時影響不敢久留則是萬劫翹誠於此滿願合衆叩頭伏地良久而聽告言天尊告曰我已上辭大帝遍別諸尊歸至雲宮因緣已畢汝欲請我不違汝心仙人聞天尊告勅喜躍無量天尊又言汝等諸仙宜且前去雲宮之中由來寂靜不宜久住塵穢雲宮大悲天尊昔應世之時暫有言說今還雲宮復歸虛無為我來此天尊大悲俯觀後學汝等諸仙應當知此爾時上仙昭靈又更請問天尊不審天尊何當得來天尊答曰我當不久二萬劫後尋即發來爾時諸仙奉諾訖已一時再拜辭別天尊次別大悲真帝頓首退後仰瞻高座不見天尊時諸仙人顧瞻三聖亦已入無唯見雲宮闕然虛靜香風微動爐烟尚氣飛蓋停空幢幡立虛天樂不鳴音響無餘是時諸仙觀上道之威神忽出有而還無良久徘徊冥冥無依齋駕雲輦相隨復歸爾時一切仙人皆已隨從昭靈上仙歸於南昌宮中修行天書陰生

寶經一十八年皆成真道二萬劫中虛心佇立爾時天尊在雲宮之中遙見諸仙得成真道乃於雲宮之中出見諸真大慈左手當此之時三十三天其門洞開是諸天人皆見天尊左手猶如白虹貫於太虛五指爪甲出五

星二

星三

色光明照於南昌之宮爾時諸真一時稽首再拜左手各於光中遙見天尊在於雲宮虛無之中有天書左契一字八色光明時諸真踊躍歡喜知是天尊選來印授道無二言見其左手在雲中宮經一萬劫然後乃收還於

雲宮光亦如是萬劫之後隨手而歸二萬劫後時諸真人蹈空立虛遙瞻上方以正月一日晨朝之時見有三色光氣從東方初日之中直下南昌宮中盤旋死轉遍於虛空香風酷烈不並尋常九萬年中朝朝如此是諸真人晨朝之時正首挹氣九十過經三十年中靈氣洞徹虛凝體中從其項後出上衝天青赤白色永不復滅二萬劫後七月一日晨朝之時忽見太平天尊三聖法身坐在三氣之中爾時天尊各故真光心間出光如初如螢

須臾遍體內外洞徹曠朗南昌上官良久之間太平天尊道身如光無有分別合天炯炯譬如盛日但無炎烈瞻視煥目光芒射人不昏不異足經千劫是諸真仙在此光中懽娛怡悅形容反嬰色如稚子足蹈虛空汎若

星六

星五

輕雲真光之力乃能如是雖經劫數心無於他道自娛都忘其餘千劫之後三聖法身忽見光中真仙無數億萬仰視上方長跪而立不敢有言天尊盡知其意是諸仙人俱得大通皆具神交亦知天尊慈其大衆廣開法門慈悲成就皆得無礙神通道力亦能七變九化達觀諸法不知天尊千變萬化能大自在能轉他人凡夫之身不經久時而成法身上天下地萬道獨尊神力無等不可思議

威魔品第十六

爾時復有色慾二界六群邪仙八萬四千人性好論議常於下界較其神力善習幻化心意矜高自號大師獨行三界心得五通壽八萬大劫聞天尊下降南昌上官率其部落乘駕獅子經六小劫上至南昌思見天尊欲較

神力校試道術天尊已知其意與諸大衆默然不動坐一龍座去地七仞爾時八萬四千邪仙一時到已仰視聖衆無心恭敬亦復不識太平天尊真仙階級欲登高座無能上者爾時邪仙之中有一大仙名曰羅比羅是邪

仙衆中第一道首變色而言我是三界大師獨明禍福聞有無上大道而此大衆何者為尊爾時天尊指昭靈真人已為天尊是時羅比厲聲言曰子有道乎昭靈答言我身無道羅比曰子無道術以何玄法禁此高座吾欲坐議即當昇上昭靈答曰我此高座名曰大道慈悲之座子將此身窮力上之亦不得昇忽強昇之亦終不得羅比問曰云何不得昇坐昭靈答曰子是下方色慾二界直脚魔邪假託仙號爾時邪仙齊舉其脚悉皆堅直不能得屈求欲坐地亦不能得是時羅比盡其神力亢聲說呪是其徒衆八萬四千空中自撲隨呪緩急爾時羅比又盡神力欲動天地是其徒衆一時倒地轉身翻覆求止不得是時羅比心猶不信更求與昭靈真人較隱形

之法爾時昭靈真人大悲聽許羅比曰子先
隱身爾時宮中聖衆一時俱隱是八萬四千
邪仙連臂空行不能得見還復本處歎未曾
有復須臾之間大衆儼然未曾一動昭靈道
君即令羅比合衆隱身是時羅比竭其威力

變成黑氣昭靈真人一過吹之八萬餘魔一
時氣靡猶如死尸冥然無知良久之間道君
又微氣噓之一時俱蘇各起悔過信向歸伏
爾時道君又以慈力吟拂魔之章令八萬四
千邪仙半生半死良久是時邪仙得蘇息已
自覺其身有腐爛氣喘頓首道前而作是言
不審天尊修學何法神力如是壽命幾何
道君告曰我修無上大道慈悲忍辱之法身
無死地神力自在道君以大悲力試而問之
子修何法住壽幾何羅比答曰我修德界四
天神呪一名如意足能壽八萬大劫上壽之
中不過於此命過之後隨業受生而我法中
能勤苦行心得五通雖有神力不脫老死雖
達空理無法長生爾時道君逆知其意而不
答之又問羅比知汝法中根本以不答曰不

知此事久遠難可詳究

道君告曰汝此法者是汝天中崑崙山精自
號四天之主或稱四天仙五或稱神王出此
法教化色慾二界邊地衆生汝之所師原本
如是非是無上大道自然之法汝下二界邊
地衆生工一小伎即號仙人因此邪仙更相
放効不識大道無上至法羅比又問上道幾
法仙有幾品經名何者聞有天尊目未曾觀
而此大衆盡名天尊復有餘號盡是上真亦
有下仙爾時真人告羅比曰上道法一論其
支流三萬六千種法元於一道仙真之品有
一百二十級皆宗天尊靈篆成文自然天書
故天經太平真君虛無天尊常在玄中以汝
凡眼五通小見不能得觀三尊真容我近學
道經數億劫位登真人而此大衆皆是上仙
羅比又問真人神力尚以無比天尊威神應
復若爲真人答曰非汝所見非汝所聞數萬
大劫之後應下化世以汝危命八萬劫壽不
見此時汝莫問此非汝所及汝身腥臊尸臭
無常欲至冷我天宮汝當急去不得久停

爾時羅比無立足處復歸下界天路遙長憶
初上時經六小劫此時年尚少壯猶故遲滯
今轉朽邁漸無神力混神迷性進退無據相
顧悲泣涕淚交連辭別真人遽還慾界圍遶
崑崙起居邪玉具說遊行之於上界觀大道
真人示其神力語其根本邪玉聞之五神振
懾絕而復蘇良久醒悟語羅比曰止勿言
諸神聞之出於人間傳說我等道術不行是
諸邪仙却居山南約水而住四時八節或附
著人歌吟哮吼自號仙玉求索禱祠修習幻
化遍行下世自出支流改制邪法擅立位號
六百餘種金闕天尊應運之時邪仙殄滅無
復遺餘爾時昭靈道君白諸真人曰邪仙初
來天尊大聖不自對此下界邪俗命我小道
示其威神我乘大道大衆之力非我獨能威
此外道邪仙塵穢之事實非所宜無上大道
逗機之時或應如此不足異也
爾時丹霍洞真名曰通玄從坐而起長跪請
問昭靈道君曰拂魔之章可記錄不願見傳
授敢欲修行昭靈道君曰此中雖復天真大

會諸有傳受不敢自尊先當上聞爾時二真
具以因緣上白太平天尊告曰欲威下道妖
精先當左叩金鐘三十六下而誦威章三遍
其文曰

金鈴電火繁烈咆憤九元殺氣流蕩焰粉萬
魔滅種千妖絕殞雷父踏空霹靂迴風斬首
醜醜推妖殛根逆我者滅順我者存七星裂
血金神曜電精刀曜電玉芥含霜威兵前驅
何鬼敢當爭氣者滅拒逆者殃上浮紫蓋下
坐金寐丹霄羅暎日月為光門據靈蟾戶衛
金芒五毒藏奸萬魔滅亡七真內養千威外
張魂歸紫闕魄入丹房

天尊告曰此是太玄內威呪滅凶殺邪後學
諸仙道未玄極恐多凶殺誦此神呪依儀鎮
術千邪喪精萬魔滅氣神平體安朗然無畏
天尊告曰上道之法無心自成不必須呪誦
此威章此是太玄虛靜道場之內威振靈冊
於邪門左叩金鐘三十六下以召威兵右擊
玉磬一十四通以集真靈中建法鼓一十二
鳴以聞上帝生神內列威兵外張雙曜入眸

口吐雲華頭達七星足踏玄綱玉爐騰煙身
坐金林萬精滅氣千妖自亡

天尊曰下土凡人單行此法不得真要年二
百四十歲鬼不能害是時丹霍洞真伏受要
言歡告禮謝奉而行之爾時丹霍洞真與後

來三十七天諸真仙等億億萬眾一時頓首
長跪上啓天尊兆以夙承餘慶運遇高尊賜
以慈悲提携淪際得易凡軀叨茲上首溫階
玄極過泰有餘不揆愚微轉當忘退心願停
此庇影南昌待慈尊下世之時願陪雲駕晨
夕侍衛執蓋參爐惟願天尊大悲恩許辭畢
再拜伏聽教言

天尊告曰大道無親善善相因子承願力何
俟多陳運期非久數萬劫間天堂遐曠任子
遊居下世之時亦須汝等助宣正法流化下
土我等三聖各化三界此時度人亦乃無數
爾時諸真聞天尊垂許侍從深果所願歡喜
慶快一時禮謝爾時天尊又告後來諸真汝
道猶淺未達至理且作一劫入凝神大定思
念都盡次入忘形大定應感皆空次入六虛

大定隨方起應次入太虛大定分身萬億次
入動惠大定能為萬化之根次入生惠大定
能遍生萬物次入大慈大定能長成萬物次
入大悲大定能藏養萬物汝能成此八事然
後位登上真俱號後聖應為大道差次應運
賜汝尊號欲隨我下世教化心不自定不能
生化真應有滯不能起感爾時天尊說此語
已即入不動凝神大定如本無異爾時諸真
亦隨天尊入凝神大定爾時天尊出此定已
又入忘形大定是時真人亦隨天尊入忘形
大定天尊出此定已又入六虛大定是時真
人亦隨天尊入六虛大定出六虛大定已又
入太虛大定是時真人亦隨天尊入太虛大
定是時天尊出此定已又入動惠是時真人
亦皆隨天尊而入動惠爾時天尊出動惠已
又入生惠是時真人亦隨天尊而入生惠天
尊出生惠已又入大慈大定是時真人皆隨
天尊而入大慈大定天尊出大慈大定已而
入大悲大定是時真人亦皆隨天尊入大悲
大定爾時天尊出定惠已即入自在神力忽

而非玄倒景步虛一瞬之間已周三萬六千
天中復歸本處凝然不動懷藏三萬六千日
月又於身中開闢三萬六千天門又於身中
登現三萬六千天帝一天帝身中各見三
萬六千天門又見三萬六千天帝各有三萬
六千侍從一一侍從各坐三萬六千龍座一
一龍座各騰飛蓋其蓋高廣遍覆諸界須臾
之間復令三萬六千天地一時震動天雨香
花地涌寶山爾時天尊身中又出三萬六千
龍輪乘三萬六千日月復歸諸天爾時三界
地中所有枯骨變起成人復令衰老一時反
嬰素髮歸玄落齒更生五藏花敷耳目聰明
須臾之間復令三萬六千天中一時風雷大
動甘雨驟流萬象發生異華動敷天洒甘露
玉髓通流真無疑仙梵唱清玄寥亮虛通響
徹無邊又令應出星宮空列雲房上凝紫霞
下結金剛十絕垂天寶蓋高張牖開明月戶
映靈芒白玉為几金精為林真宰侍侍仙童
焚香爾時天尊與諸上真俱為雲房列坐龍
座鳳唱虬吟庭舞仙禽神力萬變所作随心

時諸真人歎未曾有爾時天尊告諸真曰上
道之法力神萬變未覺經心定惠虛通無心
故為心不經而自成惠不為而自明強為不
明強作不成甚希甚微難可而名汝大通之
日自應如此眾真齊起一時禮謝諾受要言
天尊又曰如此神變及以定惠乃是大道階
級之事已應運化度世之法亦法如此
爾時天尊知諸真人心無礙智力廣大堪
任大事即與眾真升入大羅之上謁請虛無
天尊授其上真之任至億劫之後應加尊號
而至大羅之上謁虛無天尊天尊告曰子道
數已極宜錫上真之任我各侍至真之司玉
函青簡刻書已畢命諸真人讀簡看名尊號
已定眾真再拜
天尊告曰如此冥默眾真奉辭歸於南昌雲
房之中列坐大會眾真朝慶七日七夜天雨
香花振動三十七天大地之中應時踊出山
岳而應上天天地合響一時稱善當此之時
太平三尊與諸上真一時入於冥寂大定天
宮間然唯有香官使者騰烟不絕足經一劫

一劫之後天尊又出冥寂大定入於動惠須
臾之頃神霧四霽溫氣八衝微風颺煙甘露
柔塵爾時天尊出於動惠遂入生惠倏歛之
間萬象空生雲霧上騰雷吟電轉神草含英
鳳翔瓊林蓋動霞生天尊告諸真人曰動生
之法以應金闕後聖降世之期非久欲至十
方大聖同為告瑞非獨我也爾時天尊說此
語已是諸眾聖一時默坐凝然不動金爐香
花爵爵常然下降之時千變萬化當此之日
希有神力盡應見世

太上大道玉清經卷之六